

(2) Za prekršaje iz stava 1. ovog člana kaznit će se i odgovorno lice u pravnom licu novčanom kaznom od 200,00 KM do 2.000,00 KM.

(3) Za prekršaje iz stava 1. ovog člana kaznit će se i fizičko lice novčanom kaznom u iznosu od 500,00 KM do 1.500,00 KM.

Član 77.

Za prekršaje utvrđene članom 71. i 72. ovoga Zakona, ako se ponove u roku od jedne godine od pravosnažnosti rješenja o prekršaju, uz novčanu kaznu sud može izreći i zaštitnu mjeru pravnom i fizičkom licu zabranu obavljanja turističke djelatnosti u trajanju do 6 mjeseci.

Član 78.

Za prekršaje utvrđene članom 74. stav 1. tačke a., b., c., d. i e. ovog Zakona, ako se ponove u roku od jedne godine od pravosnažnosti rješenja o prekršaju, uz novčanu kaznu sud može izreći i zaštitnu mjeru zabrane pružanja usluge turističkom vodiču, pratiocu i animatoru u trajanju do 6 mjeseci.

VIII. PRELAZNE I ZAVRŠNE ODREDBE

Član 79.

Pravna lica koja pružaju usluge putničke agencije dužna su u roku od godinu dana od dana stupanja na snagu ovog Zakona, uskladiti svoje poslovanje s odredbama ovog Zakona.

Član 80.

Ministar će donijeti propise na osnovu ovlaštenja iz ovoga Zakona u roku od 6 mjeseci od dana stupanja na snagu ovog Zakona.

Član 81.

Postupci koji su pokrenuti prije stupanja na snagu ovog Zakona dovršit će se u skladu s propisima koji su važili do dana stupanja na snagu ovoga Zakona.

Član 82.

Za sve slučajeve koji nisu regulisani podzakonskim aktima, u svrhu provođenja ovog Zakona, primjenjuju se federalni propisi, ukoliko nisu u suprotnosti sa ovim Zakonom.

Član 83.

Danom stupanja na snagu ovog Zakona prestaju važiti odredbe Zakona o turističkoj djelatnosti („Službene novine HNK“, broj: 5/00), kojim se uređuje turistička djelatnost.

Član 84.

Ovaj Zakon stupa na snagu osmog dana od dana objavljivanja u “Službenim novinama Hercegovačko-neretvanskog kantona“.

Bosna i Hercegovina
Federacija Bosne i Hercegovine
HERCEGOVAČKO-NERETVANSKI KANTON
SKUPŠTINA

Broj: 02-01-VI-105/11
Mostar, 24.05.2011. godine

PREDSJEDAVAJUĆI
Ramiz Jelovac, s.r.

104

Na osnovu člana 39. Ustava Hercegovačko-neretvanskog kantona (“Službene novine HNK”, broj: 2/98, 4/00 i 7/04), Skupština Hercegovačko-neretvanskog kantona je, na sjednici održanoj 24.05.2011. godine, donijela

Z A K O N O UGOSTITELJSKOJ DJELATNOSTI

I. OPĆE ODREDBE

Član 1.

Ovim Zakonom uređuju se uvjeti za obavljanje ugostiteljske djelatnosti, osnivanje i prestanak rada ugostiteljske radnje, poslovni prostor, razvrstavanje i kategorizacija ugostiteljskih objekata, te ugostiteljske usluge u domaćinstvu, seoskom domaćinstvu i na plovnom objektu.

Član 2.

(1) Ugostiteljska djelatnost, u smislu ovog Zakona, je pripremanje hrane i pružanje usluga prehrane, pripremanje i usluživanje pića i napitaka i pružanje usluga smještaja.

(2) Ugostiteljska djelatnost je i pripremanje hrane za potrošnju na drugom mjestu sa ili bez posluživanja (u prijevoznom sredstvu, na priredbama i slično) i opskrba tom hranom (catering).

II. UVJETI ZA OBAVLJANJE UGOSTITELJSKE DJELATNOSTI

Član 3.

(1) Ugostiteljsku djelatnost mogu obavljati pravna i fizička lica koja su registrovana za obavljanje ugostiteljske djelatnosti i ispunjavaju uvjete propisane ovim Zakonom i propisima donesenim na osnovu ovog Zakona (u daljem tekstu: ugostitelj).

(2) Ugostiteljsku djelatnost pod uvjetima propisanim ovim Zakonom, u svojim poslovnim prostorijama i prostorima, može obavljati javna ustanova koja upravlja nacionalnim parkovima i parkovima prirode, ugostiteljska obrazovna ustanova, te učenički i studentski domovi.

(3) Ugostitelj može obavljati i druge djelatnosti koje služe obavljanju ugostiteljske djelatnosti, a koje se uobičajeno obavljaju uz ugostiteljsku djelatnost (prodaja novina i časopisa, duhanskih preradevina, pružanje usluga bilijara, boćanja, kuglanja, tenisa i slično), u skladu s posebnim propisima.

(4) Pod uvjetima propisanim ovim Zakonom i propisima donesenim na osnovu ovog Zakona, određene ugostiteljske usluge mogu pružati pravna i fizička lica koja nisu ugostitelji.

Član 4.

(1) Pravna i fizička lica mogu organizovati pružanje usluga smještaja i prehrane za svoje radnike, penzionere, te članove uže porodice svojih radnika i penzionera, pod uvjetima utvrđenim ovim Zakonom i drugim propisima, u objektima zatvorenog tipa (odmarališta, objekti za prehranu i slično).

(2) Članovi uže porodice, u smislu odredbe stava 1. ovog člana, su: supružnici, djeca rođena u braku ili van braka, pastorčad i usvojenici, te roditelji i usvojitelji.

(3) Pravna i fizička lica iz stava 1. ovog člana, dužna su za pružanje ugostiteljskih usluga pribaviti rješenje općinskog, odnosno gradskog organa uprave nadležnog za poslove ugostiteljstva prema mjestu sjedišta objekta (u daljem tekstu: nadležni organ) o ispunjavanju uvjeta propisanih ovim Zakonom i drugim propisima, koji to rješenje upisuju u Upisnik objekata zatvorenog tipa.

(4) Nadležni organ rješenjem utvrđuje ispunjavanje uvjeta iz propisa donesenog na osnovu stava 3. ovog člana.

Član 5.

Odredbe ovog Zakona ne primjenjuju se na pružanje usluga prehrane i smještaja u objektima ustanova socijalne zaštite, zdravstva, odgoja, obrazovanja i

drugih sličnih ustanova, vojske, policije, ako te usluge pružaju njihovi radnici isključivo svojim radnicima, pripadnicima i korisnicima.

III. PREDMET I NAČIN POSLOVANJA UGOSTITELJA (OBAVLJANJE UGOSTITELJSKE DJELATNOSTI)

Član 6.

Predmet poslovanja ugostitelja mora biti određen u skladu s odredbama ovog Zakona i drugim propisima, kao i posebnim uzansama u ugostiteljstvu i drugim poslovnim običajima u ugostiteljstvu, te vrstama i načinu pružanja ugostiteljskih usluga u odgovarajućim vrstama ugostiteljskih objekata.

Član 7.

(1) U obavljanju ugostiteljske djelatnosti, ugostitelj je obavezan:

- a) vidno istaknuti na ulazu u ugostiteljski objekat oznaku propisane vrste i kategorije utvrđenu rješenjem nadležnog organa ili rješenjem Ministarstva trgovine, turizma i zaštite okoliša (u daljem tekstu: Ministarstvo),
- b) na ulazu u ugostiteljski objekat vidno istaknuti obavijest o radnom vremenu koje treba biti u skladu s propisanim radnim vremenom,
- c) utvrditi kućni red u ugostiteljskom objektu za smještaj, istaknuti ga na recepciji, te izvod iz kućnog reda istaknuti u svim sobama i apartmanima,
- d) utvrditi normative o utrošku namirnica za pojedino jelo, piće i napitak, pružiti usluge u količinama i kvalitetu u skladu s normativima, te na zahtjev normative predložiti gostu,
- e) vidno istaknuti cijene usluga koje se nude, na način dostupan gostima i pridržavati se istaknutih i ovjerenih cijena, a kod pružanja usluga smještaja u cjenovnicima istaknuti i iznos boravišne takse, te cjenovnike staviti na raspolaganje gostima u dovoljnom broju primjeraka,
- f) izdati gostu račun za svaku pruženu ugostiteljsku uslugu koji obavezno mora sadržavati: naziv ugostiteljskog objekta, porezni ID broj, broj računa, datum i vrijeme izdavanja računa, vrstu, količinu i cijenu pruženih usluga, a kod pružanja usluga smještaja - u računu navesti iznos boravišne takse,
- g) pridržavati se propisanog radnog vremena,
- h) dostaviti normative na ovjeru nadležnom organu, a koji se mogu primjenjivati sljedećeg dana od dana ovjere,

i) dostaviti cjenovnike na ovjeru nadležnim organu, a koji se mogu primjenjivati sljedećeg dana od dana ovjere,

j) voditi knjigu gostiju u ugostiteljskom objektu za smještaj,

k) voditi knjigu žalbi na propisan način u svakom ugostiteljskom objektu, u roku od tri dana izjavljeni prigovor dostaviti nadležnoj turističko-ugostiteljskoj inspekciji, te u roku od 15 dana od dana izjavljenog prigovora odgovoriti na prigovor,

l) voditi poslovne knjige u skladu s važećim propisima,

m) alkoholna i bezalkoholna pića usluživati samo iz originalne ambalaže u skladu s normativom, na kojoj mora biti deklaracija s podacima o proizvođaču, odnosno uvozniku, te neto količini,

n) u poslovnom prostoru - objektu, u momentu kontrole, osigurati odobrenje za rad, odnosno rješenje o upisu u sudski registar, kao i rješenje o razvrstavanju, minimalnim uvjetima i kategorizaciji objekta.

(2) Radno vrijeme i raspored dnevnog i sedmičnog radnog vremena u ugostiteljskim objektima, radno vrijeme u dane državnih praznika i neradnih dana u kojem je ugostitelj dužan poslovati, utvrđuje nadležni organ.

(3) U obavljanju ugostiteljske djelatnosti ugostitelj je dužan primjenjivati poslovne običaje u ugostiteljstvu.

Član 8.

Prilikom oglašavanja i reklamiranja usluga i isticanja poruka u komercijalnom poslovanju, ugostitelj ne smije koristiti oznaku propisane vrste i kategorije koja nije utvrđena rješenjem nadležnog organa ili rješenjem Ministarstva.

Član 9.

Ugostitelj posluje tokom cijele godine ili sezonski.

Ugostitelj može poslovati i povremeno (za vrijeme manifestacija, sajmovi, prigodnih priredaba i slično).

Član 10.

(1) Zabranjeno je posluživanje, odnosno dopuštanje konzumiranja alkoholnih pića u ugostiteljskom objektu licima mlađim od 18 godina.

(2) U ugostiteljskom objektu u kojem se poslužuju alkoholna pića mora na vidnom mjestu biti istaknuta odluka o zabrani posluživanja, odnosno konzumiranja alkoholnih pića licima mlađim od 18 godina.

Član 11.

Fizička lica, u smislu odredaba ovog Zakona, mogu dobiti odobrenje za osnivanje ugostiteljske radnje samo za jedan ugostiteljski objekt na teritoriji Federacije BiH.

Član 12.

(1) Ugostiteljska se djelatnost obavlja u poslovnom objektu, prostoriji i na prostoru namijenjenom, uređenom i opremljenom za pružanje ugostiteljskih usluga (u daljem tekstu: ugostiteljski objekat).

(2) Ugostiteljska djelatnost može se obavljati i u poslovnom objektu, prostoriji i na prostoru gdje se obavlja druga djelatnost, ako su za obavljanje ugostiteljske djelatnosti ispunjeni uvjeti propisani ovim Zakonom, propisima donesenim na osnovu ovog Zakona i drugim propisima.

Član 13.

(1) Za obavljanje ugostiteljske djelatnosti u ugostiteljskom objektu moraju biti ispunjeni minimalni uvjeti za vrstu u pogledu opreme i uređenja ugostiteljskih objekata, usluga, kao i drugi uvjeti propisani ovim Zakonom i propisima donesenim na osnovu ovog Zakona (u daljem tekstu: minimalni uvjeti).

(2) Ugostiteljski objekt, osim uvjeta iz stava 1. ovog člana, mora ispunjavati uvjete u pogledu projektovanja, građenja i održavanja građevine, zaštite na radu, zaštite od požara, zaštite od buke, zaštite i unapređenja okoliša, kao i druge uvjete propisane ovim Zakonom i posebnim propisima.

(3) Za obavljanje ugostiteljske djelatnosti i pružanje ugostiteljskih usluga moraju biti ispunjeni zdravstveni uvjeti za rad u ugostiteljstvu, u skladu s posebnim propisima.

(4) Zaposleni u ugostiteljskom objektu (konobari, šankeri i ostalo osoblje) moraju imati završen najmanje treći stepen stručne spreme.

Član 14.

(1) Nadležni organ, na zahtjev ugostitelja, utvrđuje jesu li ispunjeni minimalni uvjeti za vrstu ugostiteljskih objekata koji se ne kategoriziraju.

(2) Ispunjavanje uvjeta iz stava 1. ovog člana nadležni organ utvrđuje rješenjem u roku od 15 dana od dana prijema urednog zahtjeva.

(3) Rješenje iz stava 2. ovog člana upisuje se u Upisnik o minimalnim uvjetima ugostiteljskih objekata kojeg vodi nadležni organ.

(4) Troškove postupka iz stava 1. ovog člana snosi ugostitelj.

(5) Protiv rješenja iz stava 2. ovog člana može se izjaviti žalba Ministarstvu u roku od 8 (osam) dana od dana dostavljanja rješenja.

(6) Ako nadležni organ, nakon pregleda objekta kod pravnog lica, ne donese rješenje u roku iz stava 2. ovog člana, rad u ugostiteljskom objektu može otpočeti, o čemu je ugostitelj dužan prethodno pisanim putem izvijestiti nadležni organ, ukoliko je za građevinu u kojoj se nalazi ugostiteljski objekt, u skladu s posebnim propisom, pribavio odgovarajući akt, prema kojem se građevina smije koristiti, odnosno staviti u pogon.

Član 15.

(1) Pojedine ugostiteljske usluge mogu se pružati i u pokretnom objektu koji se ne smatra ugostiteljskim objektom u smislu člana 17. ovog Zakona, ako ispunjava minimalne uvjete.

(2) Objekt iz stava 1. ovog člana je objekt koji se može premještatati iz jednog mjesta na drugo vlastitim pogonom ili vučom.

(3) Nadležni organ utvrđuje ispunjavanje uvjeta iz stava 1. ovog člana.

(4) Nadležni organ određuje prostore na kojima se mogu pružati usluge objektima iz stava 1. ovog člana.

Član 16.

(1) Ugostiteljske usluge mogu se pružati iz kioska, pod šatorom i slično, ako su ispunjeni tehnički uvjeti.

(2) Predstavnički organ jedinice lokalne samouprave određuje prostore na kojima se mogu locirati ugostiteljski objekti u skladu s regulacionim, odnosno urbanističkim planom i na udaljenosti ne manjoj od 100 metara od postojećeg ugostiteljskog objekta u građevini, osim ukoliko se ne radi o održavanju manifestacije sajma.

(3) Nadležni organ utvrđuje ispunjavanje uvjeta iz stava 1. ovog člana.

IV. RAZVRSTAVANJE, KATEGORIZACIJA, OSNIVANJE I PRESTANAK RADA UGOSTITELJSKIH OBJEKATA

Član 17.

(1) Ugostiteljski objekti, s obzirom na vrstu ugostiteljskih usluga koje se u njima pružaju, mogu biti:

- a) smještajni objekti - objekti u kojima se pružaju usluge smještaja, prehrane, pića, napitaka i slastica,
- b) ugostiteljski objekti - objekti u kojima se pružaju usluge prehrane, pića, napitaka i slastica,
- c) catering objekti - objekti u kojima se pripremaju

jela, slastice, pića i napitci za konzumiranje na drugom mjestu, sa ili bez posluživanja,

(2) Objekti iz stava 1. ovog člana razvrstavaju se u grupe i to:

a) smještajni objekti u grupe:

- 1) hoteli,
- 2) kampovi i druge vrste objekata za smještaj.

b) ugostiteljski objekti u grupe:

- 1) restorani,
- 2) barovi.

c) catering objekti u grupe:

- 1) pripremnice jela, slastica, pića i/ili napitaka,
- 2) kantine.

(3) Objekti iz grupa navedenih u stavu 2. ovog člana razvrstavaju se u pojedine vrste polazeći od načina posluživanja i pretežnosti usluga koje se pružaju u objektu.

(4) Pojedine vrste ugostiteljskog objekta mogu biti klupskog tipa (klub), u kojima se ugostiteljske usluge pružaju samo određenoj grupi gostiju (članovi kluba).

Član 18.

(1) Ugostiteljski objekt može imati naziv jedne vrste ugostiteljskog objekta.

(2) Izuzetno od odredbe stava 1. ovog člana, ugostiteljski objekat može imati naziv dvije vrste ugostiteljskih objekata, ako za svaku vrstu ispunjava uvjete propisane ovim Zakonom, propisima donesenim na osnovu ovog Zakona i drugim propisima.

(3) Naziv vrste ugostiteljskog objekta može se promijeniti ako su ispunjeni uvjeti propisani za drugu vrstu i za to izdano odgovarajuće rješenje nadležnog organa, u skladu s odredbama ovog Zakona.

Član 19.

(1) Ugostitelj ne može obavljati ugostiteljsku djelatnost u objektu iz člana 17. stav 1. tačka b) i c) ovog Zakona prije nego što od nadležnog organa dobije rješenje da objekt ispunjava minimalne uvjete propisane za određenu vrstu ugostiteljskog objekta koji se ne kategorizira.

(2) Ugostitelj ne može obavljati ugostiteljsku djelatnost u objektu iz člana 17. stav 1. tačka a) ovog Zakona prije nego što od Ministarstva dobije rješenje da objekt ispunjava minimalne uvjete propisane za određenu vrstu i kategoriju koji se označavaju sa dvije i tri zvjezdice, osim u slučaju iz člana 14. stav 6., člana 25. stav 3., člana 35. stav 7. i člana 46. stav 2. ovog Zakona.

Član 20.

Ugostiteljski objekat koji prestane ispunjavati uvjete propisane za određenu vrstu i kategoriju, ne

može poslovati kao ta vrsta i kategorija ugostiteljskog objekta.

Član 21.

Kampiranje je, prema odredbama ovog Zakona, boravak pod šatorom, u kamp-kućici, kamp- prikolici i drugoj odgovarajućoj opremi za smještaj na otvorenom prostoru.

Kampiranje je dozvoljeno isključivo u kampu.

Zabranjeno je postavljanje šatora, kamp kućica, kamp-prikolica i druge opreme za kampiranje u svrhu kampiranja van kampa.

Član 22.

Ugostiteljska radnja osniva se izdavanjem rješenja kojim se odobrava osnivanje ugostiteljske radnje koje izdaje nadležni organ.

Član 23.

(1) Nadležni organ izdat će rješenje kojim se odobrava osnivanje ugostiteljske radnje licu koje ispunjava sljedeće uvjete:

- a) da je državljanin Bosne i Hercegovine,
- b) da je poslovno sposoban,
- c) da posjeduje najmanje treći stepen stručne spreme,
- d) da udovoljava propisanim zdravstvenim uvjetima,
- e) da joj pravosnažnom sudskom presudom, rješenjem o prekršaju ili upravnim aktom nije izrečena zaštitna mjera zabrane obavljanja ugostiteljske djelatnosti,
- f) da nema zasnovan radni odnos, odnosno da nema već osnovanu ugostiteljsku radnju,
- g) da ima poslovni prostor za koji ima dokaz o pravu vlasništva ili ugovor o zakupu poslovnog prostora, te dokaz da je za poslovni prostor izdata upotrebna dozvola i da taj poslovni prostor ispunjava propisane minimalne uvjete.

(2) Rješenje iz stava 1. ovog člana može se izdati i licu koje ne ispunjava uvjet iz stava 1. tačke c). ovog člana, ako zaposli lice koje ispunjava taj uvjet.

Član 24.

Strani državljanin može obavljati ugostiteljsku djelatnost pod uvjetom da ima

radnu dozvolu, da ispunjava uvjete iz člana 23. stav 1. tačke od a) do g) ovog Zakona i uz primjenu načela uzajamnosti.

Član 25.

(1) Nadležni organ u roku od 15 dana od dana podnošenja zahtjeva izdat će rješenje kojim se

odobrava osnivanje ugostiteljske radnje, ako su ispunjeni uvjeti iz člana 23. ovoga Zakona, a u protivnom rješenjem će odbiti zahtjev.

(2) Protiv rješenja iz stava 1. ovog člana može se izjaviti žalba Ministarstvu u roku od 15 dana od dana dostavljanja rješenja.

(3) Ako nadležni organ ne donese rješenje u roku od 15 dana od dana prijema urednog zahtjeva, rad u ugostiteljskom objektu može početi, o čemu je ugostitelj dužan prethodno pisanim putem obavijestiti nadležni organ ukoliko je za građevinu u kojoj se nalazi ugostiteljski objekt, u skladu s posebnim propisom, pribavio odgovarajući akt prema kojem se građevina smije koristiti, odnosno staviti u pogon.

Član 26.

Rješenje kojim se odobrava osnivanje ugostiteljske radnje sadrži:

- a) ime i prezime, jedinstveni matični broj i adresu prebivališta podnositelja zahtjeva,
- b) naziv ugostiteljske radnje,
- c) mjesto, ulicu i broj objekta u kojem se pruža usluga,
- d) vrstu usluge koja se pruža,
- e) površinu objekta, odnosno prostora u kojem se obavlja ugostiteljska djelatnost,
- f) naznaku o pružanju usluga tokom cijele godine ili sezonski.

Član 27.

(1) Nadležni organ vodi registar ugostiteljskih radnji (u daljnjem tekstu: registar).

(2) Rješenje kojim se odobrava osnivanje ugostiteljske radnje po pravosnažnosti upisuje se u registar.

(3) Od dana upisa u registar ugostitelju počinju teći prava i obaveze u skladu s ovim Zakonom i drugim propisima.

(4) Ugostitelj je dužan u roku od šest mjeseci od dana upisa u registar otpočeti s obavljanjem ugostiteljske djelatnosti.

(5) Rješenje kojim se odobrava osnivanje ugostiteljske radnje ne može se prenijeti na drugo lice.

Član 28.

(1) Ugostiteljska radnja može početi s radom danom upisa u registar.

(2) O upisu u registar nadležni organ obavijestit će nadležnu organizacionu jedinicu porezne uprave, nadležnu turističko-ugostiteljsku inspekciju i druge organe koji vrše nadzor ili vode službenu evidenciju u oblasti ugostiteljstva, dostavljanjem pravosnažnog

rješenja kojim se odobrava osnivanje ugostiteljske radnje.

Član 29.

(1) Rješenje kojim se odobrava osnivanje ugostiteljske radnje prestaje važiti odjavom ili po sili zakona.

(2) Ugostitelj je dužan odjaviti obavljanje ugostiteljske djelatnosti pisanim putem nadležnom organu prije prestanka rada.

(3) Prestanak obavljanja ugostiteljske djelatnosti odjavom utvrđuje se danom navedenim u odjavi, s tim da se obavljanje ugostiteljske djelatnosti ne može odjaviti unatrag.

(4) Ako u odjavi nije naznačen datum prestanka ugostiteljske djelatnosti, prestanak se utvrđuje danom podnošenja zahtjeva za odjavu.

Član 30.

Rješenje kojim se odobrava osnivanje ugostiteljske radnje prestaje važiti po sili zakona:

- a) ako ugostitelj ne počne pružati usluge u roku od šest mjeseci od dana upisa u registar,
- b) ako je pravosnažnim aktom ugostitelju izrečena zaštitna mjera zabrane obavljanja ugostiteljske djelatnosti za vrijeme dok ta mjera traje,
- c) ako ugostitelj prestane ispunjavati koji od uvjeta navedenih u članu 23. ovog Zakona,
- d) danom stupanja na izdržavanje kazne ako ugostitelj bude osuđen pravosnažnom presudom na kaznu zatvora dužu od šest mjeseci,
- e) ako je inspekcijским nadzorom utvrđeno da nisu ispunjeni uvjeti propisani ovim Zakonom, propisima donesenim na osnovu ovog Zakona i drugim propisima, a utvrđeni nedostaci nisu otklonjeni u zadanom roku,
- f) ako se naknadno utvrdi da je rješenje kojim se odobrava osnivanje ugostiteljske radnje zasnovano na neistinitim podacima ili krivotvorenim dokazima.

Član 31.

U slučaju smrti ugostitelja, članovi zajedničkog domaćinstva mogu nastaviti obavljati djelatnost, putem zaposlenog radnika, ako isti ispunjava uvjete iz člana 23. ovog Zakona, u trajanju do šest mjeseci.

Član 32.

(1) O prestanku važenja rješenja u smislu člana 29. i 30. ovog Zakona nadležni organ donosi rješenje.

(2) Po pravosnažnosti rješenja ugostiteljska radnja se briše iz registra.

(3) O brisanju iz registra nadležni organ obavijestiti će nadležnu organizacionu jedinicu porezne uprave,

nadležnu turističko-ugostiteljsku inspekciju i druge organe koji vrše nadzor ili vode službenu evidenciju u oblasti ugostiteljstva, dostavljanjem pravosnažnog rješenja.

Član 33.

(1) Ugostiteljski objekti za smještaj (hoteli, kampovi i druge vrste ugostiteljskih objekata za smještaj) obavezno se kategoriziraju ovisno o uređenju, opremi, uređajima, uslugama, održavanju i ostalim elementima.

(2) Oznaka za kategoriju pojedinog ugostiteljskog objekta za smještaj je zvjezdica.

Član 34.

(1) Ugostiteljski objekti za prehranu se ne kategoriziraju.

(2) Izuzetno od odredbe stava 1. ovog člana, na zahtjev ugostitelja može se kategorizirati objekt vrste restoran iz grupe restorani.

(3) Oznaka za kategoriju pojedinog restorana je brončana, srebrena ili zlatna kuharska kapa.

Član 35.

(1) Ministarstvo, na zahtjev ugostitelja, rješenjem utvrđuje ispunjavanje minimalnih uvjeta i uvjeta za kategoriju ugostiteljskih objekata za smještaj iz skupine „Hoteli“, koji se označavaju s dvije i tri zvjezdice, u roku od 30 dana od dana prijema urednog zahtjeva.

(2) Ministarstvo, na zahtjev ugostitelja, rješenjem utvrđuje ispunjavanje minimalnih uvjeta i uvjeta za kategorizaciju ugostiteljskih objekata za smještaj iz skupine „Kampovi i druge vrste objekata za smještaj“ koji se označavaju sa dvije i tri zvjezdice, u roku od 30 dana od dana prijema urednog zahtjeva.

(3) Ministarstvo, na zahtjev ugostitelja, rješenjem utvrđuje ispunjavanje uvjeta za kategorizaciju ugostiteljskih objekata za prehranu iz skupine restorani, koji se označavaju srebrenom i brončanom kuharskom kapom u roku od 30 dana od dana prijema zahtjeva.

(4) Rješenje iz stava 1., 2. i 3. ovoga člana upisuje se u Upisnik o razvrstavanju i kategorizaciji smještajnih objekata koje vodi Ministarstvo.

(5) Troškove postupka iz stava 1., 2. i 3. ovoga člana snosi ugostitelj.

(6) Ako Ministarstvo ne donese rješenje iz stava 1., 2. i 3. ovog člana u propisanom roku ili ne donese rješenje kojim se zahtjev odbija zbog neispunjavanja propisanih uvjeta, ugostitelj može započeti raditi u ugostiteljskom objektu, o čemu je dužan prethodno pisanim putem obavijestiti Ministarstvo ukoliko je

za građevinu u kojoj se nalazi ugostiteljski objekt, u skladu s posebnim propisom, pribavio odgovarajući akt prema kojem se građevina smije koristiti, odnosno staviti u pogon.

Član 36.

(1) Ministarstvo po službenoj dužnosti svakih pet godina provodi ponovnu kategorizaciju smještajnih objekata.

(2) Kada nadležni inspeksijski organ utvrdi da smještajni objekt ne ispunjava propisane uvjete koji se odnose na dodijeljenu kategorizaciju, Ministarstvo će po službenoj dužnosti izvršiti ponovnu kategorizaciju.

(3) O provedenoj kategorizaciji iz stava 1. ovog člana Ministarstvo donosi rješenje koje se upisuje u Upisnik iz člana 35. stav 1., 2. i 3. ovog Zakona.

(4) Ministarstvo po službenoj dužnosti pazi na rok iz stava 1. ovog člana.

(5) Ako se utvrdi da smještajni objekt više ne ispunjava uvjete za utvrđenu vrstu i kategoriju, rješenjem će se utvrditi nova vrsta, odnosno kategorija smještajnog objekta ili prestanak važenja izdanog rješenja o vrsti i kategoriji.

(6) U slučaju iz stava 5. ovog člana troškove postupka snosi ugostitelj.

Član 37.

Zahtjev ugostitelja za izdavanje rješenja iz člana 35. ovog Zakona sadrži:

- a) firmu i sjedište ugostitelja,
- b) dokaz da je registrovan za obavljanje ugostiteljske djelatnosti,
- c) vrstu ugostiteljskog objekta,
- d) usluge koje će biti predmetom poslovanja ugostiteljskog objekta,
- e) podatak posluje li ugostiteljski objekat tokom cijele godine ili sezonski,
- f) prijedlog za kategoriju ugostiteljskog objekta,
- g) podatke o veličini i opremljenosti ugostiteljskog objekta.

Član 38.

(1) Rješenje iz člana 35. stav 1., 2. i 3. ovog Zakona izdat će se ugostitelju uz sljedeće uvjete:

- a) da je registrovan za obavljanje ugostiteljske djelatnosti,
- b) da ima poslovni prostor za koji ima dokaz o pravu vlasništva ili ugovor o zakupu poslovnog prostora, te dokaz da je za poslovni prostor izdana upotrebna dozvola,
- c) da objekt u kojem će se obavljati ugostiteljska djelatnost ispunjava uvjete za određenu vrstu, odnosno kategoriju objekta,

d) da ispunjava i druge uvjete propisane ovim Zakonom i propisima donesenim na osnovu ovog Zakona.

(2) Rješenje iz člana 35. stav 1., 2. i 3. izdat će se ugostitelju i ako je za poslovni prostor podnesen zahtjev za legalizaciju nadležnom organu privremeno, najduže dvije godine s mogućnošću jednog produženja.

(3) Rješenje iz stava 2. ovog člana izdat će se ugostitelju ako ispunjava uvjete iz člana 13. stav 2. ovog Zakona.

Član 39.

(1) Rješenje o ispunjavanju minimalnih i drugih Zakonom i propisima utvrđenih uvjeta ugostiteljskog objekta, odnosno o kategorizaciji ugostiteljskog objekta, prestaje važiti:

- a) ako ugostitelj u ugostiteljskom objektu ne počne s radom u roku od 6 (šest) mjeseci od dana pravosnažnosti rješenja,
- b) ako se utvrdi da je ugostitelj, odnosno ugostiteljski objekat, prestao ispunjavati neke od uvjeta propisanih ovim Zakonom i drugim propisima,
- c) odjavom obavljanja djelatnosti u ugostiteljskom objektu koja se vrši pisanim putem prije prestanka rada kod Ministarstva ili nadležnog organa, ako u odjavi nije naznačen datum prestanka obavljanja djelatnosti, prestanak se utvrđuje danom podnošenja zahtjeva s tim što se prestanak obavljanja ugostiteljske djelatnosti ne može odjaviti unatrag.

(2) O prestanku važenja rješenja iz stava 1. ovog člana, Ministarstvo donosi rješenje.

(3) Rješenja iz stava 2. ovog člana upisuje se u Upisnik iz člana 35. stav 4. i 5. ovog Zakona.

Član 40.

(1) Protiv rješenja o kategorizaciji ugostiteljskog objekta koje u prvom stepenu donosi Ministarstvo, može se u roku od osam dana od dana dostave rješenja izjaviti žalba Vladi Hercegovačko-neretvanskog kantona.

V. UGOSTITELJSKE USLUGE GRAĐANA U DOMAĆINSTVU, SEOSKOM DOMAĆINSTVU I NA PLOVNOM OBJEKTU

A. Ugostiteljske usluge u domaćinstvu

Član 41.

(1) Pod uvjetima određenim ovim Zakonom i drugim propisima donesenim na osnovu ovog Zakona

i drugim propisima, fizičko lice u domaćinstvu može:

- a) iznajmljivati gostima sobe, apartmane i kuće za odmor ako je vlasnik najviše do 10 soba, odnosno 20 postelja;
- b) organizovati kamp na svom zemljištu za najviše 20 smještajnih jedinica, odnosno 60 gostiju istovremeno.

(2) Fizičko lice u domaćinstvu može pružiti usluge doručka, polupansiona i pansiona samo gostima kojima izdaje sobe, apartmane, kuće za odmor i u kampu.

Član 42.

(1) Za pružanje ugostiteljskih usluga u domaćinstvu objekti iz člana 41. ovog Zakona moraju ispunjavati minimalne uvjete za vrstu i uvjete za kategoriju.

(2) Nadležni organ, na zahtjev fizičkog lica u domaćinstvu, rješenjem utvrđuje jesu li ispunjeni minimalni uvjeti za vrstu i uvjeti za kategoriju za objekte iz člana 41. stav 1. ovog Zakona.

Član 43.

Fizičko lice u domaćinstvu koje pruža ugostiteljske usluge obavezno je:

- a) vidno istaknuti na ulazu u objekt ili u neposrednoj blizini natpis s oznakom vrste i kategorije objekta,
- b) vidno istaknuti naziv usluga koje pruža na ulazu u objekt ili u neposrednoj blizini, cijene usluga koje nudi, kao i iznos boravišne takse,
- c) utvrditi normative o utrošku namirnica za pojedino jelo, piće i napitak i pružiti usluge u količinama i kvaliteti u skladu s normativima, te na zahtjev, normative predočiti gostu,
- d) vidno istaknuti cijene usluga koje nudi i iznos boravišne takse na propisani i uobičajen način, te se pridržavati istaknutih cijena,
- e) izdati gostu račun za svaku pruženu ugostiteljsku uslugu, koji obavezno mora sadržavati: naziv ugostiteljskog objekta, porezni ID broj, broj računa, datum i vrijeme izdavanja računa, vrstu, količinu i cijenu pruženih usluga, a kod pružanja usluga smještaja, navesti u računu i iznos boravišne takse,
- f) voditi knjigu gostiju;
- g) dostaviti normative i cjenovnike na ovjeru turističko-ugostiteljskoj inspekciji nadležnog organa, najkasnije sedam dana prije njihove primjene.

Član 44.

(1) Pri pružanju ugostiteljskih usluga, fizičkom licu u domaćinstvu mogu pomagati članovi njegovog domaćinstva.

(2) U slučaju iz stava 1. ovog člana, članovi domaćinstva moraju ispunjavati zdravstvene uvjete za rad u ugostiteljstvu, u skladu s posebnim propisima.

Član 45.

(1) Za pružanje ugostiteljskih usluga, fizičko lice u domaćinstvu dužno je pribaviti rješenje nadležnog organa kojim se odobrava pružanje tih usluga.

(2) Rješenje iz stava 1. ovog člana, izdat će se fizičkom licu u domaćinstvu uz sljedeće uvjete:

- a) da je državljanin Bosne i Hercegovine,
- b) da je poslovno sposoban,
- c) da je vlasnik objekta (soba, apartman ili kuća za odmor i slično) ili vlasnik zemljišta za kamp, te dokaz da je za objekt izdata upotrebna dozvola,
- d) da ispunjava propisane zdravstvene uvjete,
- e) da objekt u kojem će se pružati usluge ispunjava propisane minimalne uvjete i uvjete za kategoriju utvrđene rješenjem nadležnog organa,
- f) da mu nije pravosnažnom sudskom presudom ili rješenjem o prekršaju izrečena mjera sigurnosti ili zaštitna mjera zabrane pružanja ugostiteljskih usluga u domaćinstvu.

(3) Rješenje iz stava 1. ovog člana, izdat će se fizičkom licu u domaćinstvu i ako je za objekt podnesen zahtjev za legalizaciju nadležnom organu privremeno, najduže dvije godine s mogućnošću jednog produženja.

(4) Rješenje iz stava 1. ovog člana izdat će se fizičkom licu u domaćinstvu ako ispunjava uvjete iz člana 13. stav 2. ovog Zakona.

Član 46.

(1) Rješenje iz člana 45. stav 1. ovog Zakona, nadležni organ izdat će u roku od 15 dana od dana uredno podnesenog zahtjeva, ako su ispunjeni uvjeti iz člana 45. stav 2., 3. i 4. ovog Zakona.

(2) Ako nadležni organ ne donese rješenje iz stava 1. ovog člana u propisanom roku ili ne donese rješenje kojim se zahtjev odbija zbog neispunjavanja propisanih uvjeta, fizičko lice u domaćinstvu može započeti s pružanjem usluga, o čemu je dužno prethodno pisanim putem obavijestiti nadležni organ.

Član 47.

Rješenje kojim se odobrava pružanje usluga fizičkom licu u domaćinstvu sadrži:

- a) ime, prezime, jedinstveni matični broj i adresu prebivališta podnosioca zahtjeva,
- b) mjesto, ulicu i broj objekta u kojem se pruža usluga,

- c) vrstu ugostiteljske usluge, broj smještajnih jedinica i broj gostiju kojima se usluge pružaju,
- d) vrstu i kategoriju objekta u kojem se pruža usluga,
- e) naznaku o pružanju usluga tokom cijele godine ili sezonski.

Član 48.

(1) Rješenje se upisuje u Upisnik o obavljanju ugostiteljskih usluga u domaćinstvu koje vodi nadležni organ.

(2) Rješenje iz člana 47., nadležni organ dužan je dostaviti nadležnoj organizacionoj jedinici porezne uprave, nadležnoj turističko-ugostiteljskoj inspekciji i drugim organima koji vrše nadzor ili vode službenu evidenciju u oblasti ugostiteljstva.

Član 49.

(1) Rješenje za pružanje usluga fizičkom licu u domaćinstvu prestaje važiti:

- a) odjavom fizičkog lica u domaćinstvu, danom navedenim u odjavi ili danom podnošenja odjave nadležnom organu, s tim što se prestanak obavljanja ugostiteljske djelatnosti ne može odjaviti unatrag,
- b) ako fizičko lice u domaćinstvu ne otpočne pružati usluge u roku od šest mjeseci od dana upisa u registar,
- c) ako se utvrdi da je fizičko lice u domaćinstvu, odnosno objekt u kojem se pružaju ugostiteljske usluge, prestalo ispunjavati neki od uvjeta navedenih u članu 45. stav 2., 3. i 4. ovog Zakona,
- d) ako je inspeksijskim nadzorom utvrđeno da nisu ispunjeni uvjeti propisani ovim Zakonom, propisima donesenim na osnovu ovog Zakona i drugim propisima, a utvrđeni nedostaci nisu otklonjeni u zadanom roku,
- e) ako nadležni organ naknadno utvrdi da je rješenje kojim se odobrava pružanje usluga fizičkom licu u domaćinstvu zasnovano na neistinitim podacima ili krivotvorenim dokumentima.

(2) O prestanku važenja rješenja iz člana 45. stav 1. ovog Zakona nadležni organ donosi rješenje koje upisuje u Upisnik iz člana 48. stav 1. ovog Zakona.

(3) Rješenje iz člana 49. ovog Zakona, nadležni organ dužan je dostaviti nadležnoj organizacionoj jedinici porezne uprave, nadležnoj turističko-ugostiteljskoj inspekciji i drugim organima koji vrše nadzor ili vode službenu evidenciju u oblasti ugostiteljstva.

(4) Protiv rješenja o kategorizaciji koje u prvom stepenu donosi nadležni organ, može se u roku od

osam dana od dana dostave rješenja izjaviti žalba Ministarstvu.

B. Ugostiteljske usluge u seoskom domaćinstvu

Član 50.

(1) U domaćinstvu koje je organizovano kao turističko seosko domaćinstvo (u daljem tekstu: seosko domaćinstvo), član seoskog domaćinstva može pružati usluge iz člana 41., osim iznajmljivanja kuća za odmor.

(2) Osim usluga iz stava 1. ovog člana, u seoskom domaćinstvu mogu se pripremati i posluživati topla i hladna jela, te pića i napitci iz pretežno vlastite proizvodnje za najviše 50 lica (izletnika) istodobno.

(3) U seoskom domaćinstvu se mogu pružati i usluge degustacije vina ili rakije, te posluživanje domaćih narezaka iz vlastite proizvodnje u uređenom dijelu stambenog ili privrednog objekta, u zatvorenom, natkrivenom ili na otvorenom prostoru za najviše 50 lica (izletnika) istovremeno, mogu se prodavati izrađene narodne rukotvorine, kao i organizovati aktivnosti na upoznavanju naslijeđa, načina života i tradicionalne kulture seoskih područja.

(4) Na pružanje usluga u seoskom domaćinstvu primjenjuju se odredbe članova od 42. do 49. ovog Zakona.

C. Ugostiteljske usluge na plovnom objektu

Član 51.

(1) Pod uvjetima utvrđenim ovim Zakonom i drugim propisima, ugostitelj- fizičko lice može pružati usluge prehrane, pića i napitaka na svom plovnom objektu za najviše 20 gostiju istovremeno.

(2) Na pružanje usluga iz stava 1. ovog člana na odgovarajući se način primjenjuju odredbe člana 42.-49. ovog Zakona.

Član 52.

Nadležni organ dužan je rješenje u vezi s obavljanjem ugostiteljske djelatnosti u domaćinstvu, seoskom domaćinstvu i na plovnom objektu, dostaviti nadležnoj organizacionoj jedinici porezne uprave, nadležnoj turističko-ugostiteljskoj inspekciji i drugim organima koji vrše nadzor ili vode službenu evidenciju u oblasti ugostiteljstva.

VI. NADZOR

Član 53.

(1) Upravni nadzor nad primjenom ovog Zakona i propisa donesenih na osnovu ovog Zakona provodi Ministarstvo.

(2) Za provedbu ovog Zakona ministar, po potrebi, može donositi odgovarajuća upustva.

Član 54.

Inspeksijski nadzor nad provođenjem ovog Zakona i propisa donesenih na osnovu ovog Zakona, te pojedinačnih akata, uvjeta i načina rada nadziranih davaoca ugostiteljskih usluga, provodi nadležna turističko-ugostiteljska inspekcija, u skladu s posebnim propisima.

Član 55.

U provođenju inspeksijskog nadzora nadležni inspektor (u daljem tekstu: inspektor), ima ovlaštenje pregledati: poslovne i druge prostorije i prostore u kojima se obavlja ugostiteljska djelatnost, poslovne knjige, ugovore, isprave i evidencije i drugu poslovnu dokumentaciju koja mu omogućava uvid u poslovanje ugostitelja koji pruža ugostiteljske usluge, te obavljati druge radnje u svrhu inspeksijskog nadzora.

Član 56.

(1) Ugostitelj čije su prostorije i prostori, uređaji i oprema, odnosno predmeti rada i poslovanja, podvrgnuti inspeksijskom nadzoru obavezni su omogućiti inspektorima nesmetano vršenje inspeksijskog nadzora.

(2) Ugostitelj je obavezan na zahtjev inspektora dostaviti podatke, obavijesti i materijale koji su mu potrebni za obavljanje poslova iz njegove nadležnosti u primjerenom roku koji on odredi.

(3) Inspeksijski pregled treba u isto vrijeme biti obavljen na takav način da ne ometa redovno obavljanje rada i poslovanja.

Član 57.

(1) Ako inspektor prilikom inspeksijskog nadzora utvrdi da ugostitelj ne postupa u skladu s članom 7. ovog Zakona, donijet će rješenje kojim će naložiti otklanjanje utvrđenih nepravilnosti u roku od 15 dana.

(2) Ukoliko se utvrđene nepravilnosti iz stava 1. ovoga člana, ne otklone u roku od 15 dana, inspektor će izdati na licu mjesta prekršajni nalog, odnosno podnijeti zahtjev za pokretanje prekršajnog postupka.

(3) Žalba protiv rješenja iz stava 1. ovoga člana ne odlaže izvršenje rješenja.

Član 58.

(1) Ako inspektor u provedbi inspeksijskog nadzora utvrdi da se ugostiteljska djelatnost obavlja:

- a) bez registracije ili mimo registracije,
- b) bez rješenja kojim se odobrava obavljanje ugostiteljske djelatnosti, izdatog od nadležnog organa,

c) bez rješenja nadležnog organa ili rješenja Ministarstva kojim se utvrđuje kako prostor, uređaji i oprema za obavljanje ugostiteljske djelatnosti udovoljavaju propisanim uvjetima za obavljanje te djelatnosti, rješenjem će zabraniti obavljanje ugostiteljske djelatnosti subjektu nadzora koji istu obavlja na nezakonit način.

(2) Inspektor će rješenje iz stava 1. ovoga člana donijeti bez odlaganja, s utvrđenim činjenicama odlučnim za donošenje rješenja.

(3) Žalba protiv rješenja iz stava 1. ovoga člana ne odlaže izvršenje rješenja.

(4) Subjektu nadzora kojemu je zabranjen rad, inspektor će pečaćenjem ili na drugi prikladan način zatvoriti prostorije u kojima obavlja ugostiteljsku djelatnost, te može privremeno oduzeti opremu, uređaje, sredstva za rad i prijevozna sredstva kojima obavlja nezakonitu djelatnost do konačne odluke.

(5) Inspektor je obavezan uz zahtjev za pokretanje prekršajnog postupka za učinjeni prekršaj, odnosno uz prijavu za učinjeno krivično djelo, o privremenom oduzimanju predmeta odmah izvijestiti nadležni organ kod kojeg pokreće postupak zbog učinjenog prekršaja ili krivičnog djela, ovisno o kvalifikaciji djela učinjenog oduzetim predmetima.

(6) Inspeksijski organ u čijem se sastavu nalazi inspekcija osigurat će uvjete za održavanje i čuvanje privremeno oduzetih predmeta.

(7) Troškovi prinudnog izvršenja, kao i troškovi štete nastale prinudnim izvršenjem padaju na teret izvršitelja - stranke.

Član 59.

(1) Ako su poslovni prostor, uređaji i oprema namijenjeni za obavljanje ugostiteljske djelatnosti prestali ispunjavati propisane uvjete po izdatom odobrenju, inspektor će donijeti rješenje, bez odlaganja, a najkasnije u roku od osam dana od dana završetka nadzora, s utvrđenim činjenicama odlučnim za donošenje rješenja, kojim će odrediti rok ugostitelju ne kraći od 30 dana, kako bi prilagodio pružanje usluga u skladu sa Zakonom.

(2) Ako se nedostaci iz stava 1. ovoga člana ne otklone u određenom roku, inspektor će donijeti rješenje o zabrani obavljanja djelatnosti.

(3) Žalba protiv rješenja iz stava 1. i 2. ovoga člana ne odlaže izvršenje rješenja.

(4) Ukoliko ugostitelj i poslije zabrane nastavi obavljati ugostiteljsku djelatnost, nakon što je rješenje o zabrani postalo izvršno, inspektor će donijeti zaključak o prinudnom izvršenju rješenja pečaćenjem objekta.

(5) Troškovi prinudnog izvršenja, kao i troškovi štete nastale prinudnim izvršenjem padaju na teret izvršitelja - stranke.

Član 60.

Ako inspektor prilikom obavljanja inspekcijskog nadzora utvrdi nepravilnosti ili nepridržavanje propisa za čiji nadzor nije nadležan, izvijestit će nadležni organ uprave bez odlaganja, a najkasnije u roku od osam dana.

Član 61.

(1) Protiv rješenja općinskog-gradskog inspektora može se izjaviti žalba kantonalnom organu u roku od osam dana od dana dostavljanja rješenja.

(2) Protiv rješenja koje u prvom stepenu donosi kantonalni inspektor može se izjaviti žalba Ministarstvu u roku od osam dana od dana dostavljanja rješenja.

VII. KAZNENE ODREDBE

Član 62.

(1) Novčanom kaznom od 1.500,00 do 15.000,00 KM kaznit će se za prekršaj pravno lice ako:

- a) obavlja ugostiteljsku djelatnost protivno odredbama člana 3. ovog Zakona,
- b) ne pruža ugostiteljske usluge u skladu s odredbama iz člana 7. ovog Zakona,
- c) ugostiteljski objekat ne ispunjava uvjete u pogledu uređenja i opreme ugostiteljskih objekata, usluga projektiranja, građenja i održavanja građevine, zaštite od požara, zaštite od buke, zaštite i unaprjeđenja okoliša, zdravstvene uvjete za rad u ugostiteljstvu, u skladu s posebnim propisima, kao i druge uvjete propisane ovim Zakonom i propisima donesenim na osnovu ovog Zakona (član 13. stav (1.), (2.) i (3.)),
- d) ako ugostitelj započne obavljati ugostiteljsku djelatnost u ugostiteljskom objektu prije nego što pribavi rješenje od nadležnog organa da objekt ispunjava minimalne uvjete propisane za određenu vrstu ugostiteljskog objekta koji se ne kategorizira, te dobije rješenje od Ministarstva ili nadležnog organa da objekt ispunjava propisane minimalne uvjete i uvjete za određenu kategoriju, osim u slučaju iz člana 14. stav 6., člana 25. stav 3., člana 35. stav 7. i člana 46. stav 2. ovoga Zakona.

(2) Za prekršaje iz stava 1. ovog člana kaznit će se i odgovorno lice u pravnom licu novčanom kaznom od 1.000,00 KM do 3.000,00 KM.

(3) Za prekršaje iz stava 1. ovog člana kaznit će se fizičko lice novčanom kaznom u iznosu od 150,00 KM do 1.500,00 KM.

Član 63.

(1) Novčanom kaznom od 1.000,00 do 10.000,00 KM kaznit će se za prekršaj pravno lice ako:

- a) pruža usluge smještaja i prehrane licima koji nisu njeni članovi, penzioneri, te članovi uže porodice i pensionera (član 4. stav 1. i 2.),
- b) objekt u kojem pruža ugostiteljske usluge ne ispunjava uvjete propisane ovim Zakonom i drugim propisima (član 4. stav 1. i 4.),
- c) pruža ugostiteljske usluge u objektu zatvorenog tipa bez rješenja nadležnog organa (član 4. stav 3.),
- d) za oglašavanje i reklamiranje usluga i isticanje poruka u komercijalnom poslovanju koristi oznaku propisane vrste i kategorije koja nije utvrđena rješenjem nadležnog organa ili rješenjem Ministarstva (član 8.).

(2) Za prekršaje iz stava 1. ovog člana kaznit će se i odgovorno lice u pravnom licu novčanom kaznom od 200,00 KM do 2.000,00 KM.

(3) Za prekršaje iz stava 1. ovog člana kaznit će se fizičko lice novčanom kaznom u iznosu od 150,00 KM do 1.500,00 KM.

Član 64.

(1) Novčanom kaznom od 500,00 do 5.000,00 KM kaznit će se za prekršaj pravno lice ako:

- a) ne utvrdi normative o utrošku namirnica, pića i napitaka za pojedine usluge prehrane, pića i napitaka i ne pruži usluge u količinama i kvalitetu u skladu s normativima ili na zahtjev normative ne predoči gostu (član 7. stav 1. tačka d.),
- b) vidno ne istakne cijene usluga koje se nude, na način dostupan gostima ili ako se ne pridržava istaknutih i ovjerenih cijena ili ako kod pružanja usluga smještaja u cjenovnicima ne istakne i iznos boravišne takse, te ako cjenovnici nisu na raspolaganju gostima u dovoljnom broju primjeraka (član 7. stav 1. tačka e),
- c) ne izda gostu račun za svaku pruženu ugostiteljsku uslugu koji obavezno mora sadržavati: naziv ugostiteljskog objekta, porezni ID broj, broj računa, datum i vrijeme izdavanja računa, vrstu, količinu i cijenu pruženih usluga, a kod pružanja usluga smještaja - u računu i iznos boravišne takse (član 7. stav 1. tačka f),
- d) ne dostavi normative na ovjeru nadležnom organu ili ih počne primjenjivati prije utvrđenog

Hercegovačko-neretvanskog kantona

- roka (član 7. stav 1. tačka h),
- e) ne dostavi cjenovnike na ovjeru nadležnom organu ili ih počne primjenjivati prije utvrđenog roka (član 7. stav 1. tačka i),
 - f) ne vodi knjigu gostiju u ugostiteljskom objektu za smještaj (član 7. stav 1. tačka j),
 - g) ne vodi knjigu žalbi na propisan način u svakom ugostiteljskom objektu,
 - h) u roku od tri dana izjavljeni prigovor ne dostavi nadležnoj turističko-ugostiteljskoj inspekciji, te ne odgovori na prigovor u propisanom roku (član 7. stav 1. tačka k),
 - i) ne vodi poslovne knjige u skladu s važećim propisima (član 7. stav 1. tačka l),
 - j) poslužuje alkoholna pića gostu mlađem od 18 godina (član 10.),
 - k) ne pruža ugostiteljsku uslugu u pokretnom objektu na propisan način ili ne zadovoljava propisane uvjete ili pruža ugostiteljsku uslugu u pokretnom objektu na prostoru koji nije utvrdio nadležni organ (član 15. stav 1. i 5.),
 - l) ne pruža ugostiteljske usluge iz kioska, pod šatorom i slično na propisan način ili ne zadovoljava propisane uvjete (član 16. stav 1. i 5.).

(2) Za prekršaje iz stava 1. ovog člana kaznit će se i odgovorno lice u pravnom licu novčanom kaznom od 200,00 KM do 2.000,00 KM.

(3) Za prekršaje iz stava 1. ovog člana kaznit će se fizičko lice novčanom kaznom u iznosu od 150,00 KM do 1.500,00 KM.

Član 65.

(1) Novčanom kaznom od 500,00 KM do 5.000,00 KM kaznit će se za prekršaj pravno lice ako:

- a) vidno ne istakne na ulazu u ugostiteljski objekt propisanu oznaku vrste i kategorije utvrđene rješenjem nadležnog organa ili rješenjem Ministarstva (član 7. stav 1. tačka a),
- b) na ulazu u ugostiteljski objekat vidno ne istakne obavijest o radnom vremenu ili ako ta obavijest nije u skladu s propisanim radnim vremenom (član 7. stav 1. tačka b),
- c) u ugostiteljskom objektu za smještaj ne utvrdi kućni red i ne istakne ga na recepciji ili izvod iz kućnog reda ne istakne u svim sobama i apartmanima (član 7. stav 1. tačka c),
- d) se ne pridržava propisanog radnog vremena (član 7. stav 1. tačka g).

(2) Za prekršaje iz stava 1. ovog člana kaznit će se i odgovorno lice u pravnom licu novčanom kaznom od 200,00 KM do 2.000,00 KM.

(3) Za prekršaje iz stava 1. ovog člana kaznit će se fizičko lice novčanom kaznom u iznosu od 150,00 KM do 1.500,00 KM.

Član 66.

(1) Novčanom kaznom u iznosu od 150,00 KM do 1.500,00 KM kaznit će se za prekršaj fizičko lice u domaćinstvu ako:

- a) iznajmljuje gostima sobe, apartmane i kuće za odmor s više od deset soba, odnosno dvadeset postelja, organizuje kamp na svom zemljištu za više od dvadeset smještajnih jedinica, odnosno šezdeset gostiju istovremeno (član 41. stav 1. tačke a i b),
- b) pruža usluge doručka, polupansiona ili pansiona protivno odredbi člana 41. stav 2.;
- c) objekat u kojem pruža usluge ne ispunjava minimalne uvjete i uvjete za kategoriju (član 42.),
- d) ne utvrditi normative namirnica, pića i napitaka, za pojedine usluge prehrane, pića i napitaka ako takve usluge pruža i ne pruži usluge u skladu s utvrđenim normativima, te na zahtjev gosta ne predoči normative (član 43. stav 1. tačka c),
- e) vidno ne istakne cijene usluga koje nudi i iznos boravišne takse, na propisan i uobičajen način, te ako se ne pridržava istaknutih cijena (član 43. stav 1. tačka d),
- f) ne izda gostu račun za svaku pruženu ugostiteljsku uslugu, koji obavezno mora sadržavati: naziv ugostiteljskog objekta, porezni ID broj, broj računa, datum i vrijeme izdavanja računa, vrstu, količinu i cijenu pruženih usluga, a kod pružanja usluga smještaja ne navede u računu i iznos boravišne takse (član 43. stav 1. tačka e),
- g) ne vodi knjigu gostiju (član 43. stav 1. tačka f),
- h) ne dostavi normative i cjenovnike na ovjeru turističko-ugostiteljskoj inspekciji nadležnog organa ili ih ne dostavi u utvrđenom roku (član 43. stav 1. tačka g),
- i) koristi rad lica koja nisu članovi njegovog domaćinstva (član 44. stav 1.),
- j) članovi domaćinstva ne ispunjavaju propisane zdravstvene uvjete za rad u ugostiteljstvu, u skladu s posebnim propisima (član 44. stav 2.),
- k) pruža usluge iz člana 41. i 50. ovoga Zakona, a ne ispunjava propisane minimalne uvjete, odnosno uvjete za kategoriju ili ih pruža bez pribavljenog odobrenja nadležnog organa,
- l) pruža usluge smještaja, prehrane, pića i napitaka, a nije član seoskog domaćinstva ili ako pruža usluge smještaja protivno odredbi člana 50. stav

1. ovoga Zakona ili ako priprema i poslužuje topla i hladna jela, pića i napitke koji nisu pretežno iz vlastite proizvodnje ili ako pruža usluge prehrane ili ako pruža usluge degustacije vina ili rakije ili posluživanja domaćih narezaka koji nisu iz vlastite proizvodnje (član 50. stav 2. i 3.).

Član 67.

Novčanom kaznom od 100,00 KM do 1.000,00 KM kaznit će se za prekršaj fizičko lice u domaćinstvu ako:

- vidno ne istakne oznaku propisane vrste i kategorije (član 43. stav 1. tačka a).

Član 68.

(1) Novčanom kaznom od 50,00 KM do 500,00 KM kaznit će se za prekršaj lice koje kampira van kampa ili postavlja šator, kamp-kućicu, kamp-prikolicu i drugu opremu za kampiranje sa svrhom kampiranja van kampa (član 21. stav 2. i 3.).

(2) Za prekršaj iz stava 1. ovog člana može se izreći zaštitna mjera oduzimanja predmeta kojima je počinjen prekršaj.

Član 69.

Novčanom kaznom za ne postupanje po rješenju inspektora (član 57. stav 2.) kaznit će se:

- pravno lice novčanom kaznom od 500,00 KM do 1.500,00 KM,
- odgovorno lice u pravnom licu novčanom kaznom od 200,00 KM do 500,00 KM,
- fizičko lice novčanom kaznom od 300,00 KM do 500,00 KM.

Član 70.

Za prekršaje utvrđene članovima 64., 66. i 67. ovog Zakona ako se ponove u roku od jedne godine od pravosnažnosti prvog rješenja o prekršaju, uz novčanu kaznu, sud može izreći i zaštitnu mjeru zabrane obavljanja ugostiteljske djelatnosti u trajanju do šest mjeseci i za fizičko lice i za pravno lice.

VIII. PRELAZNE I ZAVRŠNE ODREDBE

Član 71.

Pravna i fizička lica kojima je obavljanje ugostiteljske djelatnosti odobreno po ranijim propisima dužna su usaglasiti svoje poslovanje s odredbama ovog Zakona u roku od godinu dana od dana njegova stupanja na snagu.

Član 72.

Do donošenja propisa na osnovu ovlaštenja iz ovoga Zakona primjenjivat će se važeći propisi.

Član 73.

Postupci koji su pokrenuti prije stupanja na snagu ovog Zakona, dovršit će se u skladu s propisima koji su važili do dana stupanja na snagu ovoga Zakona.

Član 74.

Za sve slučajeve koji nisu regulisani podzakonskim aktima, u svrhu provođenja ovog Zakona, primjenjuju se federalni propisi, ukoliko nisu u suprotnosti sa ovim Zakonom.

Član 75.

Danom stupanja na snagu ovog Zakona prestaju važiti odredbe Zakona o ugostiteljskoj djelatnosti („Službene novine HNK“, broj: 5/00), kojima se uređuje ugostiteljska djelatnost.

Član 76.

Ovaj Zakon stupa na snagu osmog dana od dana objavljivanja u “Službenim novinama Hercegovačko-neretvanskog kantona”.

Bosna i Hercegovina
Federacija Bosne i Hercegovine
HERCEGOVAČKO-NERETVANSKI KANTON
SKUPŠTINA

Broj: 02-01-VI-106/11
Mostar, 24.05.2011. godine

PREDSJEDAVAJUĆI
Ramiz Jelovac, s.r.